




**„ოქროს საწმისის“ ქვეყანამ უნდა შექმნას ეკონომიკური
განვითარების საკუთარი მოდელი**

ახლახან გამოვიდა წიგნი „საქართველოს ეკონომიკა“ ქალბატონ როზეტა ასათიანის მთავარი რედაქტორობით. ნაშრომი შედგება 22 თავისაგან. მასში ქრონოლოგიურად არის გაშუქებული დასაბამიდან დღემდე მრავალსაუკუნოვანი ისტორიის მქონე და ამავე დროს მრავალჭირნახული საქართველოს ეკონომიკური განვითარების რთული გზა. გამოკვლევა ერთდროულად ორი ისტორიული მოვლენის – პოლიტიკური თავისუფლების მოპოვებისა და საბაზრო ეკონომიკაზე გადასვლის კატაკლიზმებით სავსე პერიოდს მოიცავს. წიგნში მოცემულია საქართველოს ეკონომიკაში უახლოეს პერიოდში ელვისებურად განვითარებული მოვლენების განვლილი თუ მიმდინარე ეკონომიკური პროცესების, ქვეყანაში მომხდარი არსებითი ძვრების, მიღწეული წარმატებებისა თუ ჩავარდნების მეცნიერული შეფასება. მოვლენათა კრიტიკული ანალიზის საფუძველზე გაკეთებულია დასკვნები, რომ-

ლებიც განმტკიცებულია ფაქტობრივი მონაცემებით.

უკვე ოცი წელია საქართველოში მიმდინარეობს რთული, წინააღმდეგობებით სავსე პროცესები. მეტად მძიმე აღმოჩნდა წარსულის მემკვიდრეობა. ათეული წლების განმავლობაში მსოფლიო ეკონომიკურ იზოლაციაში ყოფნას უკვალოდ არ ჩაუვლია. ახალი ეკონომიკური აზროვნება ძნელად იკაფავს გზას. არადა, დრო არ ითმენს. რეფორმატორთა ერთგვარი დილემა ნტიზმი მოუფიქრებელი გადაწყვეტილებებისა და გაუმართლებელი დასკვნების მიზეზი გახდა, რამაც ქვეყანა სერიოზულ შეცდომებამდე მიიყვანა. საქართველო თავისი არსებობის მანძილზე ერთ-ერთ ყველაზე საპასუხისმგებლო ეტაპზე აღმოჩნდა. არსებული არაორდინარული სოციალურ-ეკონომიკური სიტუაცია საქართველოში მრავალ რთულ პრობლემას წარმოშობს. ასეთ სიტუაციაში დიდი მნიშვნელობა აქვს

თანამედროვე საქართველოს ეკონომიკის პრობლემეტიკის კომპლექსურ შესწავლას (მისი წინა პერიოდის ლოგიკური შეფასებისა და მოსალოდნელი შედეგების ჩათვლით), რომელიც პოლიტიკურ, სოციალურ და სხვა პრობლემებთან მჭიდროდაა დაკავშირებული.

საბაზრო ეკონომიკისაკენ მიმავალ რთულ გზაზე, სადაც ყოველი ნაბიჯი – სამართლებრივი ბაზის შექმნა, საკუთრების განსახელმწიფობრივება, საბაზრო ინფრასტრუქტურის ჩამოყალიბება თუ სხვა, არა მხოლოდ ორგანიზაციულ სიძნელეებს, არამედ ეკონომიკური განვითარებისადმი ახლებურ მიდგომას უკავშირდება. სწორედ ეს დაედო საფუძვლად წინამდებარე გამოკვლევას. იგი ეძღვნება ეკონომიკურ ლიტერატურაში სისტემური სახით ნაკლებად შესწავლილ, ზეაქტუალურ და ამასთან, მასშტაბურ პრობლემას.

ნაშრომი მიზნად ისახავს ეკონომიკური რეფორმების კონკრეტულ-ისტორიულ გარემოსთან კავშირში წარმოჩენას, ეკონომიკური განვითარების წინააღმდეგობრივი პროცესებისა და მათი ურთიერთზემოქმედების თავისებურებების ახსნის საფუძველზე ინსტიტუციური რეფორმების ანალიზს, საქართველოს საბიუჯეტო-საგადასახადო და ფულად-საკრედიტო სისტემების რეფორმირებასთან დაკავშირებული საკითხების გაშუქებას, საქართველოს ეროვნული სიმ-

დიდრისა და დემოგრაფიული განვითარების ტენდენციების განხილვასთან ერთად ქვეყნის სპეციფიკური თავისებურებების მქონე რეგიონული ეკონომიკის შესწავლას. წიგნის სტრუქტურა წარმოდგენილია აგრარულ, ინდუსტრიულ და მომსახურების სექტორებად და შესაბამის დარგებად, გამახვილებულია ყურადღება საქართველოში საკურორტო-რეკრეაციული პოტენციალისა და ტურიზმის განვითარების აუცილებლობაზე. ნაშრომის ლოგიკურად დასრულების მიზნით საქართველოს ეკონომიკა გაშუქებულია გლობალური პროცესების ჭრილში, რამაც, მსოფლიოში აპრობირებული გამოცდილების საფუძველზე, წარმოაჩინა ქვეყნის კრიზისიდან გამოსვლის გზები, მისი ლამაზი ტრადიციებისა და დიდი პოტენციალის რეალიზაციის შესაძლებლობები.

საქართველოსთვის მიუღებელია რომელიმე ქვეყნის განვითარების მოდელის მთლიანად გადმოღება-გამოყენება. საქართველოს აქვს საკუთარი ისტორიული თუ სოციო-კულტურული ტრადიციები, რომელსაც შესაბამისი მოდელი მიესადაგება. ამიტომ მსოფლიოში გამორჩეული თავისებურებების მქონე „ოქროს საწმისის“ ქვეყანამ უნდა შექმნას ეკონომიკური განვითარების საკუთარი მოდელი.

ასეთი პათოსითა და სამშობლოსადმი უდიდესი სიყვარულით არის დაწერილი ეს წიგნი.